

आकाशवाणी

खबरां

1. केंद्री मंत्रिमंडल नै कोई 95उ ज्हार करोड़ रपे दी लागता दे 6 प्रस्तावें गी मंजूरी देई दिती ऐ।
2. प्रधानमंत्री नरेंद्र मोदी होरें भारत दे स्वास्थ्य क्षेत्र च बदलाव विकास दा मुख् स्तम्भ दस्सेआ।
3. विदेश मंत्री डॉ. एस जयशंकर होरें विकासशील ते अल्प विकसित देशें कन्नै सहयोग गी प्रोत्साहित करने लेई संयुक्त राष्ट्र च सुधारें दा आह्वान कीता ते संयुक्त राष्ट्र महासभा सत्र दे बक्ख बाहरें न्यूयार्क च ग्लोबल साउथ देशें दे नेताएं कन्नै बैठकां कीतिआं।
4. केंद्री बण्ज बपार ते उद्योग मंत्री पीयूष गोयल होरें आखेआ जे भारत गी अमरीका कन्नै उर्जा बपार बदाने दी मेद।
5. चुनाव आयोग नै जम्मू-कश्मीर थमां राज्यसभा दी 4 सीटें लेई द्विवार्षिक चुनावें ते पंजाब च उपचुनावें दी घोशणा कीती।
6. एशिया कप टी-20 क्रिकेट च अज्ज सुपर फोर च अज्ज भारत दा मुकाबला बांगलादेश कन्नै दुबई च खेड्डेआ जाग।

<><><><><>

Cabinet

केंद्री मंत्रिमंडल नै अज्ज कोई 95 ज्हार करोड़ रपे दी लागत दे 6 प्रस्तावें गी मंजूरी देई दिती ऐ। केंद्री मंत्रिमंडल नै अज्ज भारत दे जहाज निर्माण ते समुंद्री परिस्थितिकी तंत्र गी पुर्नजीवित करने लेई 69 ज्हार 725 करोड़ रपे दे इक व्यापक पैकेज गी मंजूरी दिती। नमी दिल्ली च मीडिया गी जानकारी दिंदे होई केंद्री सूचना ते प्रसारण मंत्री अश्विनी वैष्णव होरें आखेआ जे एहू पैकेज घरेलू क्षमता गी मजबूत करने, दीर्घकालिक वित्त पोषण च सुधार ते ग्रीनफील्ड ते ब्राउनफील्ड शिपयार्ड विकास गी बढ़ावा देने लेई डिजाइन कीता गेआ। इक 4 स्तम्भीय नजरिया पेश करदा ऐ। उनें आखेआ जे एहू तकनीकी क्षमताएं ते कौशल गी बी बदाना ते इक मजबूत समुंद्री बुनियादी ढांचा बनाने लेई कनूनी, कराधान ते नीतिगत सुधारें गी लागू करोग। उनें आखेआ जे इस पैकेज तैहत जहाज निर्माण वित्तीय सहायता योजना गी 31 मार्च 2036 जेदी कुल राशिन 24 ज्हा 736 करोड़ रपे होग। श्री वैष्णव होरें आखेआ जे इस योजना दा मकसद भारत च जहाज निर्माण गी प्रोत्साहित करना ऐ ते इस च 4 ज्हार करोड़ रपे शा मती दे आवंटन कन्नै इक शिपब्रेकिंग क्रेडिट नोट बी शामिल ऐ।

<><><><><>

PM-Healthcare

प्रधानमंत्री नरेंद्र मोदी होरें भारत दे स्वास्थ्य क्षेत्र च सुधार गी लेइयै बददी पंछान गी राष्ट्र विकास दा इक मुख् स्तम्भ दस्सेआ। प्रधानमंत्री होरें मन्ने-परमन्ने कार्डिइक सर्जन डॉ. देवी प्रसाद शेटी दा इक लेख सांझा कीता। प्रधानमंत्री होरें आखेआ जे आयुष्मान भारत पोषण अभियान ते स्वच्छ भारत ना छड़ा जनस्वास्थ्य दे परिणाम च सुधार लेआ'रदे न, बल्के अर्थ बवस्था गी मजबूती देआ'रदे न।

<><><><><>

PMAY-G

सरकार नै दस्सेआ ऐ जे प्रधानमंत्री आवास योजना ग्रामीण तैहत 2 करोड़ 82 लक्ख शा मते मकानें दा निर्माण कम्म पूरा होई चुके दा ऐ। बरे 2016 च शुरू कीती गेदी इस योजना दा मकसद ग्रामीण क्षेत्रें च सब्बनं लेई आवास प्रदान करना ऐ। ग्रामीण विकास मंत्रालय आसेआ इस बरे अगस्त तोड़ी राज्यें ते केंद्र शासित प्रदेशें गी कुल 4 करोड़ 12 लक्ख मकानें दा लक्ष्य आवंटित कीता गेआ हा। इंदे च 3 करोड़ 85 लक्ख मकानें दी मंजूरी दिती जाई चुकी दी ऐ ते 2 करोड़ 82 लक्ख शा मते मकानें दा कम्म पूरा होई चुके दा ऐ।



## Iran-US

ईरान दे सर्वोच्च नेता अली खामनेई होरें मजूदा हालात च अमरीका कन्नै परमाणु वार्ता खलाफ चेतावनी दिंदे होई आखेआ जे इस कन्नै ईरान दे राश्ट्री हितें दी पूर्ति नेई होग। उनें आगाह कीता जे नेह वार्ता कन्नै ईरान गी भारी नुकसान होई सकदा ऐ जिस च किश दी भरपाई शायद पूरी नेई होई सकोग। खामनेई होरें अमरीका दे रूख दी आलोचना करदे होई आखेआ जे अमरीका नै ईरान दी परमाणु गतिविधियें ते यूरेनियम संवर्धन पर रोक लाने दी मंग करदे होई वार्ता दा नतीजा पैहलें गै तय करी लैता ऐ। उनें आखेआ जे इस चाल्ली दा रूख वास्तविक वार्ता नेई बल्के हुकम चलाने ते थोपने दे समान ऐ। ईरान नै जुलाई 2015 च विश्व शक्तियें कन्नै इक परमाणु समझौते पर दस्तखत कीते हे जिस च प्रतिबंधें गी हटाने दे बदले च अपने परमाणु कार्यक्रम दे किश पहलुएं पर रोक लाने पर सहमति व्यक्त कीती गई ही।



## EAM-UNGA

विदेश मंत्री डॉ. एस जयशंकर होरें 80में संयुक्त राश्ट्र महासभा सत्र दरान अज्ज न्यूयाक्र च ग्लोबल साउथ देशें दी इक उच्च स्तरीय बैठक दी मेजबानी कीती। डॉ. जयशंकर होरें इकजुटता ते सहयोग गी बदाने दे मकसद कन्नै ग्लोबल साउथ देशें बश्कार परामर्श गी प्रमुखता देने लेई मजूदा मंचें दा उपयोग करने दा आह्वान कीता। उनें संयुक्त राश्ट्र ते समग्र बहुपखवाद च सुधारें पर बी प्रस्ताव रक्खेआ। डॉ. जयशंकर होरें इक सोशल मीडिया पोस्ट च दस्सेआ जे उनें सिंगापुर दे विदेश मंत्री विवियन बालाकृष्णन, St. लूसिया दे अपने समकक्ष अल्वा बेपिटिस्ट ते सोमालिया दे विदेशमंत्री अबदीसलाम अली हुंदे कन्नै बी मुलाकात कीती। डॉ. जयशंकर होरें नीदरलैंड दे विदेश मंत्री डेविड वैन वील कन्नै मुलाकात कीती ते उन्दे कन्नै यूरोपीय रणनीतिक स्थिति ते भारत दे दृष्टिकोण पर गहन चर्चा कीती।



## Goyal-Clen Energy

बणज बपार ते उद्योग मंत्री पीयूष गोयल होरे आखेआ जे भारत अगले 5 बरें च स्वच्छ उर्जा दा विस्तार करने लेई इक बेहतरिनी स्थिति च ऐ। न्यूयार्क च अमरीका-भारत रणनीतिक सांझेदारी मंच गी संबोधित करदे होई पीयूष गोयल होरें आखेआ जे सरकार दा लक्ष्य स्वच्छ उर्जा क्षमता गी 250 गीगावाट थमां बढ़ाइयै 450 गीगावाट करना ऐ। उनें आखेआ जे भारत दे उर्जा सुरक्षा लक्ष्यें च अमरीका दी भागीदारी होग। उनें आखेआ जे सरकार औने आहले बरें च उर्जा उत्पादें पर अमरीका कन्नै अपने बपार गी बदाने दी मेद रक्खदा ऐ।



## Prez. Culture

राश्ट्रपति द्रौपदी मुर्मू होरें आर्थिक शक्ति दे रूप च बढ़दी प्रतिष्ठा कन्नै-कन्नै भारत दी सांस्कृतिक शक्ति दे रूप च उंदी पंछान गी मजबूत करने लेई सामूहिक प्रयासें दी जरूरतें पर बल दित्ता ऐ। अज्ज नमी दिल्ली च ललित कला अकादमी आसेआ आयोजित 64में राश्ट्री कला प्रदर्शनी दे पुरस्कार समारोह च राश्ट्रपति होरें आखेआ जे कला सांस्कृतिक विरासत गी समृद्ध बनाने दा इक सशक्त माध्यम ऐ। उनें आखेआ जे भारती कला निरंतर, विकसित होआ'रदी ऐ ते नमे, आयाम प्रस्तुत करा'रदी ऐ।



## PM-Auction

प्रधानमंत्री नरेंद्र मोदी होरें नागरिकें गी अपील कीती ऐ जे ओह बक्ख-बक्ख मौकें पर भेंट कीते गेदे उपहारें ते स्मृति चिन्हें दी निलामी च हिस्सा लैना। इक सोशल मीडिया पोस्ट च प्रधानमंत्री होरें आखेआ जे निलामी थमां हासल राशि गंगा नदी दे संरक्षण ते पुर्नद्वार लेई नमामि गंगे कार्जक्रम पर खर्च कीती जाग।



## ECI-R.S Polls

भारती चुनांऽ आयोग नै राज्यसभा च जम्मू-कश्मीर दिएं खाली पेदिएं 4 सीटें लेई कार्जक्रम जारी करी दिता ऐ। एहू सीटां फरवरी 2021 थमां जम्मू-कश्मीर च विधानसभा नेई होने कारण खाली पेदियां न ते हून कीजे इत्थे विधानसभा बनी गेदी ऐ तां एहूदे लेई चुनांऽ कराया जाह्ग। चुनांऽ आयोग आसेआ जारी कार्जक्रम मुजब चुनांऽ लेई अधिसूचना 6 अक्तूबर 2025 गी जारी कीती जाह्ग। नामांकन दाखल करने दी खीरी तरीक 13 अक्तूबर होग जिसलै जे 14 तरीक गी दाखल नामजदगिएं दे कागजें-पत्रें दी जांच कीती जाह्गं मेदवार जेकर चाहन तां 16 अक्तूबर तगर नामांकन वापस लेई सकडन जिसले जे मतदान 24 अक्तूबर गी बडुलै 9 बजे कोला लेइयै शामी 4 बजे तगर होग ते वोटें दी गिनतरी बी उसै रोज कीती जाह्ग ते एहू पूरी प्रक्रिया 28 अक्तूबर गी तोड़ चढी जाह्ग। तोआई, पंजाब च बी उपचुनाएं दी घोशणा चुनांऽ आयोग आसेआ कीती गेई ऐ।

<><><><><><>

### India Pak UNHC

भारत नै संयुक्त राष्ट्र मानवाधिकार परिषद च पाकिस्तान दी त्रिकुषी आलोचना करदे होई आखेआ जे ओहू भारत खलाफ निराधार ते भडकाउ बयानबाजी करिये इस वैश्विक मंच दा दुरूपयोग करा'रदा ऐ। जिनेवा स्थित संयुक्त राष्ट्र च भारती स्थाई मिशन दे काउंसलर क्षितिज त्यागी होरें परिषद दे 60में सत्र गी संबोधित करदे होई एहू टिप्पणी कीती। उनें आखेआ जे पाकिस्तान गी भारत पर अवैध कब्जा जमाने दी कोशश करने दे बजाय उसी खाली करना लोडचदा ते अपनी गंभीर आर्थिक स्थिति गी सुधारने पर ध्यान केंद्रित करना लोडचदा जेड़ा वर्तमान च जीवनरक्षक प्रणाली पर टिकी दी ऐ।

<><><><><><>

### Asia Cup

मर्दे दी टी-20 एशिया कप क्रिकेट टूर्नामेंट च भारत दा मुकाबला दुबई क्रिकेट स्टेडियम बंगलादेश कन्नै होग। एहू मैच भारतीय समें मताबक रातीं 8 बजे नै शुरु होने आला ऐ। उआं कल संजा यू.ए.ई दे अब्बूधाबी दे शेख जायद स्टेडियम च आयोजित सुपर-4 मुकाबले च पाकिस्तान नै श्रीलंका गी 5 विकटें कन्नै हराया। अज्ज दे मैच दे विजेता फाइनल च अपनी थाह पक्की करी लैग। दवें टीमें अपने शुरुआती मैच जित्ते दे ना। भारत नै पाकिस्तान गी 2 मुकाबलें च हराए दा ऐ ते बांगलादेश नै श्रीलंका खिलाफ मुकलबा जित्ते दा ऐ।

<><><><><><>

### Asian Games

युवा कार्य ते खेड्डू मंत्रालय नै 2026 दे एशियाई खेड्डू ते होरनें खेड्डू प्रतियोगिता च व्यक्तिगत ते टीमें दी भागीदारी लेई चयन नियम निर्धारित कीते ना। एहूदा मकसद प्रक्रिया च पारदर्शिता आहना ऐ तां जे तगमा जित्तेने दे वास्तविक हकदार खडारियें गी गै प्रतियोगिताएं च हिस्सा लैने दा मौका थहोई सकै। इस च एशियाई खेड्डू, पैरा एशियाई खेड्डू, राष्ट्रमंडल खेड्डू, यूथ ओलंपिक्स खेड्डू ते एशियाई युवा खेड्डू जनेई खेड्डू प्रतियोगिता च हिस्सा लैने दे बारे फैसले लैने दे दिशा-निर्देश होडन। ओलंपिक ते होरनें अंतरराष्ट्री प्रतियोगिता लेई एहू नियम लागू नेई होग।

<><><><><><>

### Weather

भारती मौसम विभाग नै अजज ओडिशा ते छत्तीसगढ़ च भारी थमां मती गै भारी बरखा दी पेशगोई कीती ऐ। मौसम विभाग नै अगले 2 थमां 3 दिनें तोड़ी उत्तर पूर्वी दे किश हिस्सें, बिहार, तटीय आंध्र प्रदेश, पूर्वी मध्य प्रदेश, गंगा आहले पच्छिम बंगाल, झारखंड, तेलंगाना ते विदर्भ लेई भारी बरखा दी पेशगोई कीती ऐ।

<><><><><><>